
Шартномавий мажбуриятни бажарган фермер яна 10 тоннадан зиёд пахта сотмоқчи

Бу йил 57 гектар майдонга чигит қадаган ва 120 тоннага яқин ҳосил олишни мақсад қилган “Ғани ота” фермер хўжалиги аъзолари мавсум бошидан буён 135 тонналик хирмон уйдилар. Хўжалик раҳбари, халқ депутатлари туман Кенгаши депутати Фарҳоджон Саримсоқов биз билан суҳбатда, бу – ҳали ҳаммаси эмаслигини айтади:

- Яна 10-15 тонна пахта бор далаларимизда. Об-ҳавосидан бериб турса, етилган кўсақлар қийғос очилиб ётибди, мавсум охирига қадар шиддатни сусайтирмаймиз. Президентимизнинг қишлоқ хўжалиги соҳасида олиб бораётган ислохотлари сабабли, пахта бу йил пулга, ҳақиқий даромад манбаига айланди. Қанча кўп меҳнат қилсанг, ҳалол тер тўксанг, топганинг – ўзингни бўлиб қолди. Шунга, астойдилмиз...

Бугун ҳам хўжалик далаларида йиғим-терим ишлари авж олди. Туман ҳоқими Юсуфжон Хусаинов бошчилигидаги сектор раҳбарлари хўжалик шийпонида бўлишиб, мавсум бошидан буён илғорликни қўлдан бермай келаётган теримчиларни рағбатлантирдилар.

- Депутатлар ҳам бугун “ҳорманг”га келишди, - дейди фермер. - Улар ташаббус кўрсатишиб, бир этак-бир этакдан пахта теришди, теримчиларга елкадош бўлишди. Чамамда, бугун пунктга 3 тоннага яқин пахта боради хўжалигимиздан.

Таъкидлаш керакки, далада яратилган қулай маиший шарт-шароитлар, терим пулларининг ўз вақтида тарқатилаётгани, қолаверса, илғор теримчиларнинг доимий равишда рағбатлантириб борилаётгани “Ғани ота”нинг илғорлар сафида боришида асосий омил бўлаётир.

Бағдод тумани ҳокимлиги Ахборот хизмати

2022-10-15 18:38:04